

直隸趙州志卷十

人物志

武功

戡亂之功與經邦並重人君所由聽鼓鼙思將帥也
太史公稱燕趙多豪俠剛勁之風古今同揆若李左
車之論燕齊李元忠之測爾朱斯固成算在胸洞若
觀火貴謀不貴勇矣次則李煥之平蠻李景遺李愬
之舉義李思行李孟嘗之參佐命牛元翼之抗強藩
均能戮力行間勛勒鐘鼎所謂矯矯虎臣者非與我
國家震疊聲靈安不忘危揆文之世猶思奮武比年盜

弄潢池中夏繹騷三輔近郊頻罹焚掠賴茲熊羆同
心盪滌羣醜所願鏡清砥平父老不識兵革豈非幸
事哉

北魏

李顯甫

李煥

北齊

李景遺

李愍

隋

李子雄

唐

李思行

李孟嘗

李觀

牛元翼

明

王之蓋

趙完望

國朝

王心

北魏

李顯甫靈孫豪俠知名集諸李數千家於殷州西山開李魚川方五六十里居之顯甫爲宗主以軍功賜爵平棘子位河南太守弟華字甯夏初爲羽林中郎步兵校尉膂力過人頗有將畧賜爵欒城子中山太守

魏書

李煥字仲文小字醜瓌秀林從弟有幹用少與酈道元俱爲李彪所知自給事中轉恆州刺史穆泰據代都謀反煥與任城王澄推治之煥先驅至州宣旨曉諭仍誅泰等齊豫州刺史裴叔業以壽春歸附詔煥以本官爲軍師與楊大眼等率眾迎接煥至淮南叔業子植遣使送

質煥等濟師入城撫慰民咸忻悅仍行楊州事賜爵容
城伯荆蠻擾動煥慰勞之降者萬餘家除梁州刺史時
武興氏楊集起舉兵作逆令弟集義邀斷白馬戍煥督
軍討之大破集義軍秦州民呂苟兒反煥令石長樂由
麥積崖赴援屬都督元麗至遂共平之時氏王楊定進
猶據方山與苟兒影響煥密募氏趙芒路斬定進還朝
卒

魏書

北齊

李景遺元忠族叔少雄武有膽力好結聚亡命爲盜以俠
聞及高祖舉義於信都景遺赴軍門高祖素聞其名接

之甚厚命與元忠舉兵於西山仍與大軍俱會擒刺史
爾朱羽生以功除龍驤將軍爾朱兆來伐又力戰有功
進爵昌平郡公出爲潁州刺史未幾爲前潁川太守元
洪威所襲殺

北齊書景遺
或作景逸

李愍字魔憐元忠宗人形貌魁傑見異於時少有大志年
四十猶不仕唯招致姦俠爲徒侶孝昌之末天下兵起
愍潛居林慮山觀候時變安樂王元鑒遣使徵愍假節
別將鎮鄴城東郭葛榮餘黨南抄陽平鑒命愍討之頗
有斬獲及鑒謀逆愍詐患暴風得免未幾除奉車都尉
持節鎮汴河葛榮南逼遣葛萇擊愍愍據險拒戰萇不

得前爾朱榮至表授愍建忠將軍遷樂平太守洛京傾
覆愍率所部西保石門山高祖建義招愍愍擁眾數千
人以赴除相州刺史令率本眾西還舊鎮愍至鄉據馬
鞍山依險爲壘徵糧集兵以爲聲勢太昌初出爲南荆
州刺史常州大都督此州自孝昌以來舊路斷絕前後
刺史皆從間道始得達州愍勒部曲數千人徑向懸瓠
從北陽復舊道且戰且前三百餘里所經之處卽立郵
亭蠻左大服梁遣任思祖圍逼下澁戍愍討破之於州
內開立陂渠溉稻千餘頃公私賴之轉行東荊州加散

騎常侍

北齊書

隋

李子雄裔子少慷慨有大志陝州破隨周軍入長安家世
並以文學自通子雄獨習騎射兄子旦讓之曰棄文尙
武非士大夫素業子雄曰自古誠臣貴仕文武不備而
能濟功業者鮮矣旣文且武兄何病焉子旦無以應仕
周累遷小賓部從達奚武與齊人戰於芒山諸軍大破
子雄所領獨全從滕王道破吐谷渾於青海以功加上
儀同韋孝寬定淮南拜亳州刺史隋文帝受禪拜鴻臚
卿進爵高都郡公及晉王廣出鎮并州以子雄爲河北
行臺兵部尙書上謂曰吾兒旣少卿兼文武之才今者

推誠相委吾無北顧憂矣子雄頓首流涕誓以效命子
雄當官正直侃然有不可犯之色王甚敬憚吏人稱焉
歲餘卒官

北史

唐

李思行趙州人避仇太原唐公將起兵使覬伺長安還具
論機策以贊大義授左參統軍從破霍邑平京師累擢
嘉州刺史封安樂郡公李孟嘗亦趙人終右武衛大將
軍漢東郡公始高祖論太原首功李思行等十四人後
太定功臣封戶總四十三人李孟嘗戶四百

唐書

李觀其先自趙郡徙洛陽少沈厚寡言以策干朔方節度

使郭子儀子儀遣佐坊州刺史吳佑爲防遏使以親喪
解吐蕃內寇代宗幸陝觀隱轍屋率鄉里子姓千人守
黑水虜不敢侵嶺南節度使楊慎微奏爲偏將徐浩李
勉代節度使倚以軍政數捕平劇賊遷大將試殿中監
召爲右龍武將軍涇師叛觀適番上卽領兵千餘扈德
宗奉天詔盡察諸軍整飭巡邏增募五千人輦旂謹豎
士氣益振從至梁州帝還詔總後軍擢四鎮北庭行軍
涇原節度使在屯四年訓部伍儲藏饒衍平涼之盟吐
蕃不得志是年觀入朝前一日就道虜至期出精騎狙
擊不及去

唐書

牛元翼趙州人材果而謀王承宗時倚其計爲強雄與傅
良弼二人冠諸將王廷湊叛穆宗以元翼在成德名出
廷湊遠甚自深州刺史擢爲深冀節度使以攜其軍廷
湊怒遣部將王位以銳兵攻元翼不勝乃合朱克融共
圍之詔進元翼成德軍節度使以宣武兵五百進援元
翼固守長慶二年詔赦廷湊罪徙元翼山南東道以深
州賜廷湊使中人促元翼廷湊恨之已受詔兵不解招
討使裴度貽書誚讓克融解而歸廷湊退舍淹月元翼
率十餘騎冒圍跳德棣朝京師廷湊入盡殺元翼親將
臧平等百八十人元翼見延英資問優綽聞平等死憤

恚卒悉還所賜於朝廷奏遂夷其家

唐書

明

王之蓋原名之翰字飛白庠生因解師弟難忤學使者意
褫其衿遂以武科解元歷陞昭勇將軍寇薄城下之蓋
條議悉中機宜又預燭師之欺及遷西粵參軍眾山寨
訛言相煽爲亂之蓋飛檄示以忠信悉就帖然一紙書
勝於十部從事竟以勞卒於官後人稱其忠義祀忠義
趙完璧字含璞庠生改中武科授涿州守備以軍功累陞
、遊擊將軍都指揮同知誥封宣武將軍

國朝

王心字又一庠生讀書好韜鈴善騎射從大參王燬招撫
邢魏指授方畧班師錄功授河南大梁道守備時有寇
警嘗單騎招撫凡羽書檄奏皆出其手終勞瘁於官焉

忠烈

疾風勁草見危授命烈士之常也人臣披堅執銳身
列行間陷胸決脰者亦曰職在則然若夫橫經之彥
負耒之氓相與授甲登陣興團結隊止期保城郭衛
鄉井耳職守無所拘名義無所繫生未邀可食之祿
死難被不朽之名徒以同類號召甘冒鋒鏑而不悔
倘非素堅袍澤之志其不望塵奔潰者幾何哉嗚呼
亦可哀已趙人以死勤事名見諸史爲耿訢李暉若
而人其他盡節疆場者明社將遷有紳士守城殉難
事比歲盜賊倣擾有鄉團禦寇覆軍事亦忠烈之流

走州元
卷一
亞也故備錄其人使知兩間正氣未嘗不萃於是邦

云

漢

耿訢

北魏

李暉
李遵

唐

李育德

宋

張旦